

## ՀՐԱԺԵՇՏ

Այստեղ ահա կրբաժանվենք  
Մնաս բարյավ, սիրելի.  
Այսպես ես չեմ ցավել երբեք  
Դառնությունով սիրտս լի:

- 5 Այստեղ ահա քեզ թողնում եմ  
Եվ չգիտեմ, ուր կերթաս.  
Կասկածներից ես դողում եմ...  
Թող պահպանե քեզ Աստված:

- Ա՛խ, առանց քեզ տխուր կյանքիս  
10 Օրը տարի կդառնա,  
Բայց, ուր լինիս, դարձյալ հոգիս  
Շուրջդ պիտի թրթռա:

- Մնաս բարյավ, բայց միշտ հիշիր,  
Որ քեզ շատ եմ կարոտել,  
15 Եվ տեսության ժամի համար  
Չըմոռանաս աղոթել: